

13 AUG 2000
Haji-Persidangan
g



KUALA LUMPUR, 13 Ogos (Bernama) -- Malaysia diberi penghormatan oleh kerajaan Arab Saudi untuk menjadi tuan rumah persidangan panduan haji yang pertama kali diadakan di luar tanah Arab.

Ketua Pegawai Eksekutif Lembaga Tabung Haji Datuk Badroddin Kassim berkata sebanyak 49 negara Islam dan negara-negara bukan Islam yang menghantar jemaah haji ke tanah suci setiap tahun akan dijemput menyertai persidangan dari 30 Sept hingga 2 Okt.

Sebagai contoh, walaupun Filipina bukan negara Islam tetapi memandangkan ia mempunyai jemaah haji, pihak menguruskan jemaah haji negara itu akan dijemput menghadiri persidangan yang akan dirasmikan Perdana Menteri Datuk Seri Dr Mahathir Mohamad, katanya kepada Bernama.

Kira-kira 80 peserta termasuk ketua negara Islam yang diiringi menteri haji masing-masing dan ketua-ketua pengurusan haji negara bukan Islam dijangka menghadiri persidangan itu.

"Kita bangga diberi kepercayaan menjadi tuan rumah persidangan itu kerana ini membuktikan kepercayaan kerajaan Arab Saudi terhadap pengurusan haji kita ke tanah suci yang sempurna," katanya.

Badroddin berkata persidangan kali ini akan ditambah skopnya mencakupi panduan mengenai persediaan ilmiah dan kerohanian untuk jemaah haji di seluruh dunia.

"Persidangan di sini nanti mempunyai peranan yang lebih meluas dengan objektif tertentu ke arah memperbaiki pengurusan haji negara-negara itu berbanding yang lazim di adakan di Arab Saudi yang menekan kepada pengurusan haji," katanya.

Persidangan itu diadakan tiap-tiap dua tahun di negara yang akan dipilih menjadi tuan rumah mengikut giliran.

Badroddin berkata beliau akan membentangkan satu kertas kerja mengenai cara pengendalian haji oleh Malaysia agar pengalaman negara ini dapat dikongsi bersama dengan peserta di persidangan itu nanti.

Tiga kagi negara yang akan membentangkan kertas kerja pada persidangan itu ialah Turki, Jordan dan Senegal.

Persidangan yang dianjurkan oleh Kementerian Haji dan Wakaf Arab Saudi itu lazimnya diadakan dalam musim haji bagi membolehkan kerajaan negara itu mendapat pandangan mengenai pergerakan dan aturan yang dilaksanakan dalam musim haji.

Katanya walaupun Malaysia menjadi tuan rumah, urusan dan tanggungjawab persidangan termasuk jemputan adalah dibawah Kementerian Haji dan Wakaf Arab Saudi.

Selain bermesyuarat, para peserta akan dibawa melihat pengendalian kursus haji oleh Tabung Haji dan melawat Melaka.

-- BERNAMA

ARA ES RON